



4. Radunanza cumünela dals 5.10.2016 a las 20.00 in sela polivalenta S-chanf

Presidi: Duri Campell

Actuar: Duri Schwenninger

Preschaints: Preschaints sun 38 votantas e votants

Büro electorel: Robert Luigi Angelini e Steivan Luzi

Tractandas:

1. Protocol da la radunanza dals 30.08.2016
2. Nouva sarinera regiunela Engiadin'Ota, credit fr. 2'530'000.00
3. Nouva cunvegna cun la vschinauncha da Zuoz per la collavuraziun forestela ed infrastrukturas a partir dals 01.01.2018
4. Nominaziuns per tschernas cumünelas dals 30.10.2016, trienni 2017-2019
5. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 30.08.2016 vain approvo.

16 7.100 Chanalisaziun/sarinera Nouva sarinera regiunela Engiadin'Ota, credit fr. 2'530'000.00

Il president salüda als rapreschantants da la ARO, a Thomas Nievergelt e Peter Plebani e surdo il pled. Quels spiegian in fuorma d'üna preschantaziun cha las sarineras existentas Schlarigna, Sax a Bever e Furnatsch a S-chanf sun classificedas per arduond 114'000 abitants. L'ova, chi vain nettageda da quellas, passa fin S-chanf e vain svieda i'l chanel da las Ouvras Electricas Engiadina. Las sarineras sun gnidas fabricedas avaut 33 fin 45 ans, dimena nun accumulieschan quellas pü las pretaisas d'hozindi. Impè da renover las 3 sarineras, dess gnir fabriceda üna nouva sarinera centrela sün l'areal da l'ara Furnatsch a S-chanf. Tenor stüdis chaschunessan quellas trais cuosts da gestiun annuels da 1,23 milliuns dapü scu la sarinera centrela cun 6.13 milliuns francs. Ils cuosts totels da fabrica chi sun gnieu erueus cun fer la lavur da planisaziun muntan a fr. 76,5 milliuns per la nouva sarinera. La nouva sarinera Engiadin'Ota metta ün böt satisfand a regard tecnologia, energia efficianta, da maniera compacta, insistenta ed in prüma lingia economicamaing. La construcziun modulara garantiescha üna granda flexibilitèd. Uschè po quella gnir fabriceda tenor cifra dals abitants, e schi fo üna vouta dabsögn, eir gnir ingrandida. Per eviter fabricats da capacitèds otas sün reservas, po la nouva sarinera gnir ingrandida, scha las ulteriuras vschinaunchas da la regiun dals trais lejs in Engiadin'Ota vulessan insacura fer part a la sarinera a S-chanf. La radunanza da delegios suottametta a las vschinaunchas da San Murezzan fin S-chanf üna dumanda da credit da fr. 76,5 milliuns. Tenor l'artichel 6 alinea 1

cif. 5 in colliaziun cun l'artichel 6 alinea 2 dals statüts da l'ARO vela la dumanda scu approveda, scha la magiurited da las vschinaunchas acceptan quella. Cun ün'approvaziun dal credit da la magiurited da las vschinaunchas commembras, vegnan tuot las vschinaunchas commembras obliedas da fer part. Zieva chi sun gnidas dedas tuot las spiegaziuns giavüschedas intuna il president cumünel, cha la finanziaziun dal nouv fabricat e da la gestiun da la sarinera ho da gnir indemniso sur il conto da las taxas da l'ov'ascra (finanziaziun speciela) da las vschinaunchas. Tar nossa vschinauncha nu vess que da der augmains da las taxas, siand cha tar la planisaziun da las taxas s'ho già resguardo l'investiziun preschainta e las taxas actuelas bastan tenor stima per bgers ans. La radunanza decida unanimamaing da deliberer il credit ill'otezza da fr. 2'530'000.00 per la fabrica da la nouva sarinera d'Engiadin'Ota.

**17 0.130 Collavuraziuns intercumünelas
Nouva cunvegna cun la vschinauncha da Zuoz per la collavuraziun
forestela ed infrastructures a partir dals 01.01.2018**

Il president spiega, cha la cunvegna cun la vschinauncha da Zuoz per la collavuraziun forestela ed infrastructures chi'd es ida in vigur ils 01.01.2014 scada la fin da l'an 2017. Tenor la constituziun cumünela artichel 33 alinea 8 es la radunanza cumünela competenta da decider sur da collavuraziuns cun otras vschinaunchas. Cun que s'ho preparo üna nouva, respectivamaing adatto minimel la cunvegna cun ün temp illimito, ma cun la pussibilitad da desdir la collavuraziun minch'an süls 31.12., respettand ün temp da desditta d'ün an. Our da quel motiv s'ho eir uossa resguardo quel temp da desditta ed as suottametta auncha quist an la cunvegna a la radunanza cumünela, e tenor decisiun avair temp d'invier ils pass necessaris. Ün temp da desditta d'ün an pera radschunaivel, siand cha las 2 vschinaunchas vessan d'organiser da nouv las lezchas e prubabel eir acquister maschinas. In mincha cas s'ho la collavuraziun verificada fich bain düraunt tuot ils 3 ans passos, perque s'ho stuvieu fer eir be minimelmaing müdamaints illa nouva cunvegna. Cha'l cussagl cumünel da Zuoz ho intaunt già approvo la cunvegna preschainta. Zieva cuorta discussiun decida la suprastanza unanimamaing d'accepter la cunvegna preschainta.

**18 0.113 Elecziuns
Nominaziuns per tschernas cumünelas dals 30.10.2016, trienni 2017-2019**

Il president spiega, cha tenor constituziun cumünela, artichel 39, ho d'avair lö aunz la tscherna üna radunanza per fer propostas, cun que s'ho decis d'integrer las nominaziuns illa radunanza preschainta.

Tschernas 2016, trienni 2017-2019

<i>Carica</i>	<i>Sezs</i>	<i>Noms dals candidats</i>
President cumünel	1	Peter Angelini, nouv Gian Fadri Largiadèr, nouv Gian Andrea Bott, nouv
Vice-president cumünel	1	Paolo Bernasconi, nouv
Suprastanza cumünela	3	Paolo Bernasconi, fin co Jnes Barblan, fin co Liun Quadri, fin co Roman Parli, nouv
Suppleant suprastanza cumünela	1	
Cussagl da scoula	2	Doris Florineth, fin co Nina Defila-Bisaz, fin co
Cumischiun da gestiun	3	Linard Parli, fin co Christian Berger, fin co Daniel Platzer, nouv

Las tschernas a l'urna, 1. scrutin, haun lö in dumengia, ils 30.10.2016.

19 9.999 Varia

Il president orientescha, cha'l chanzlist ho desdit la piazza süls 31.12.2016. Our dal ravuogl vain fat attent, cha l'alp Chaschauna es gnida serreda zieva l'alpageda, cha que saja cunter l'üsit da S-chanf cha las alps haun dad esser aviertas. Il president sclarescha culs pertuchos.

Il president serra la radunanza a las 21.30 ed ingrazcha a tuot ils preschaints per lur cumparsa.

In buna fè

Il president:

L'actuar:

D. Campell

D. Schwenninger